

# GOSOS A SAN PIO DA PIETRELCINA

Padre Pio 'e Pietrelcina,  
Faghide a dogni costu,  
*Nois d'ottenner postu*  
*In sa domo divina.*

1. In sa Campana Regione  
Naschidu e maduradu  
In famiglia educadu,  
A santa religione  
Cun vera vocazione  
Cun santidade inclina

*Nois d'ottenner...*

2. Inclina de santidade  
E lughidu determinu  
Fattendesì Capuccinu  
In sa giovane edade  
Mustrende in abbondade  
Virtude manna e fina

*Nois d'ottenner...*

3. Manna e fina virtude  
In sa Cheja de Cristos  
Passende momentos tristos  
Finas in sa salide  
Constrastadu che rude  
De sa zente bighina.

*Nois d'ottenner...*

4. De sa bighina zente  
Senza de lu cumprendere  
Ma oe pro lu difendere  
Est sa Cheja interamente  
Ponendelu presente  
Che figura eroina.

*Nois d'ottenner...*

5. Che eroina figura  
Che sos Santos portentos  
In piattas monumentos  
Eriginde cun cura  
Pregande cun premura  
In paisu e zittadina.

6. In sa Cherubina dimora  
Ue sezis approdadu  
De anghelos inghiriadu  
In cuss'etern'aurora,  
Ammenta nos dognora  
A sa Potenza Trina.

*Nois d'ottenner...*

7. In mischina tribulìa  
De chie bivet in pena  
Chi finet sa cadena  
De s'anima in presonia  
Ch'incontret giusta via  
Pro vida diamantina.

*Nois d'ottenner...*

8. Pro diamantina vida  
E bella serenidade,  
Santu Pio, non mancàde,  
Pro sa zente affligida  
Siat sempre nudrida  
D'amorosa meighina.

*Nois d'ottenner...*

9. Sa meighina amorosa  
procura pro sos terrenos,  
Fizos nostros e anzenos  
Tengan vida luminosa  
E istima armoniosa  
De contìnu e ladina.

*Nois d'ottenner...*

10. In sa peregrina andèra  
Chi Tue has connoschidu,  
De istimatas feridu  
In visibile manera,  
Cu passenzia vera  
In turmentosa ispina.

*Nois d'ottenner...*

11. Pro sa pellegrina zente  
Dande consizos giustos,  
Che torran'a dom'infustos  
D'amor'in coro e mente,  
Manda fide possente  
Pro sa giusta dottrina.

*Nois d'ottenner...*

12. Sa raighina in fundu  
arricchida 'e salute,  
Pro fruttos de virtude  
In dogn'albure giocundu,  
Pro governare su mundu  
Cun paghe genuina.

*Nois d'ottenner...*

13. Nos trascina a s'amore  
cun su profumu 'e rosa  
A sa zente disizosa  
de nd'intender s'odore  
Eroico Cunfessore  
Forte ancora abboghina.

*Nois d'ottenner...*

14. In terra, mare e chelu  
T'idiana sos soldados  
Dae Te fin salvados  
O Protettore Anghèlu!  
De s'anima faghias isvelu  
Si fit santa o miserina.

*Nois d'ottenner...*

Padre Pio 'e Pietrelcina  
Faghide a dogni costu  
*Nois d'ottenner postu*  
*In sa domo divina.*